



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka (“Službeni glasnik BiH” broj 95/12), člana 25. Pravilnika o godišnjim finansijskim izvještajima političkih stranaka (“Službeni glasnik BiH” broj 96/13), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka (“Službeni glasnik BiH”, broj: 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2013. GODINU HSS – NHI

Broj: 03-07-6-507/14
Sarajevo, 18. juni 2015. godine

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
Predmet revizije.....	5
Cilj revizije.....	5
Obim revizije.....	5
4. PRETHODNE REVIZIJE	5
5. NALAZI I PREPORUKE	6
5.1. NALAZI.....	6
5.2. PREPORUKE.....	11

MIŠLJENJE REVIZORA

Služba za reviziju finansiranja političkih stranaka (u daljem tekstu: Služba za reviziju) je izvršila reviziju finansijskog izvještaja HSS - NHI za 2013. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka ("Službeni glasnik BiH" broj 95/12), te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskom izvještaju, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom smo utvrdili da je HSS - NHI u izvještajnom periodu prekršila odredbe člana 4. stav (1), člana 11. i člana 12. stav (1), (3) i (4) Zakona o finansiranju političkih stranaka.

Prema našem mišljenju, osim navedenog, a obzirom na ograničen djelokrug revizije, revidirani finansijski izvještaj ne ukazuje na kršenja i drugih odredaba Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je reviziju godišnjeg finansijskog izvještaja HSS - NHI za 2013. godinu.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, HSS-NHI se finansirala iz sljedećih izvora:

Red. br.	Vrsta prihoda	Iznos u KM	Učešće u uk. prih. %
1	Članarina	0,00	0,00%
2	Prilozi fizičkih lica (3-a)	0,00	0,00%
3	Prilozi pravnih lica (3-b)	0,00	0,00%
4	Prihodi od imovine (3-c)	0,00	0,00%
5	Prihodi od pr.lica (3-d)	0,00	0,00%
6	Prihodi od poklona (3-e)	0,00	0,00%
7	Prihodi iz budžeta (3-f)	86.716,38	100,00%
8	Prihodi od propag. (3-g)	0,00	0,00%
9	Ostali prihodi	0,00	0,00%
I	Ukupni prihodi	86.713,38	100,00%
II	Kreditno zaduženje kod banaka	0,00	0,00%
	Izvori finansiranja (I+II)	86.716,38	100,00%

Prema podacima iz godišnjeg finansijskog izvještaja, HSS-NHI je ostvarila rashode u ukupnom iznosu od 121.459,52 KM.

2. PREDSTAVLJANJE POLITIČKE STRANKE

Naziv političke stranke je HSS-NHI. Politička stranka je Rješenjem, broj: 065-0-Reg-08-001502 od 16.05.2008. godine upisana u registar političkih organizacija kod Općinskog suda u Sarajevu, pod nazivom HSS-NHI, kao pravni sljednik Hrvatske seljačke stranke BiH i Nove hrvatske inicijative. Sjedište političke stranke je upisano u Ulici Titova 9a u Sarajevu.

Rješenjem Općinskog suda u Sarajevu, broj: 065-0-F1-14-000001 od 17.04.2014. godine, upisana je promjena naziva stranke i promjena sjedišta. Naziv stranke je Hrvatski narodni savez BiH. Skraćeni naziv stranke je HNS BiH.

Sjedište HNS BiH je u Sarajevu, u ulici Husrefa Redžića broj 10/8 Centar Sarajevo.

Tajništvo stranke je aktom, sa oznakom sl., od 19.05.2015. godine obavijestilo Centralnu izbornu komisiju BiH da je nova adresa stranke u Ulici Petrakijina broj 2 u Sarajevu.

Lica ovlaštena za zastupanje stranke su: predsjednik Drago Džambas, zamjenik predsjednika Ivo Nedić, dopredsjednici Tomislav Tomljanović, Alen Čošković i Vinko Vukelja, predsjednik Glavnog odbora stranke Krešimir Zubak i v.d. glavnog tajnika Dalibor Stanić.

Lice ovlašteno za podnošenje finansijskih izvještaja je Branimira Almaš.

Prema podacima koje je HSS-NHI navela u godišnjem finansijskom izvještaju za 2013. godinu, njenu organizacionu strukturu stranke čine:

- Glavni odbor HSS-NHI Sarajevo,
- 6 kantonalnih organizacija,
- 2 regionalne organizacije,
- 28 općinskih organizacije

3. OPIS REVIZIJE

Predmet revizije je godišnji finansijski izvještaj HSS-NHI za 2013. godinu i to sljedećih organizacionih dijelova političke stranke:

- Središnjeg ureda HSS-NHI u Sarajevu,
- Kantalnog odbora HSS-NHI Središnja Bosna i
- Kantalnog odbora HSS-NHI Herceg Bosna.

Cilj revizije je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je HSS-NHI u izvještajnom periodu postupala u skladu sa odredbama Zakona o finansiranju političkih stranaka.

Obim revizije finansijskih izvještaja HSS-NHI obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

Obim revizije je bio ograničen, obzirom da politička stranka revizorima nije omogućila uvid u kompletnu finansijsku dokumentaciju i poslovne knjige njenih organizacionih dijelova, koji su bili predmetom revizije, u skladu sa Zakonom o finansiranju političkih stranaka.

4. PRETHODNE KONTROLE I REVIZIJE

Služba za reviziju je zaključno sa finansijskim izvještajima za 2007. godinu obavila pregled i reviziju pojedinačnih finansijskih izvještaja političkih stranaka Hrvatske seljačke stranke BiH i Nove Hrvatske inicijative, koje su se tokom 2008. godine ujedinile u političku stranku HSS-NHI. U periodu od 2008. do 2012. godine Služba za reviziju je obavila reviziju i pregled finansijskih izvještaja HSS-NHI, nakon čega su izdati izvještaj o reviziji, odnosno izvještaji o pregledu sa mišljenjem revizora, nalazima revizije i preporukama.

Nakon izvršenog pregleda za 2012. godinu, izdat je izvještaj sa nalazima revizije i preporukama stranci da ne prima priloge koji su zakonom zabranjeni, da finansijske izvještaje dostavlja u rokovima propisanim Zakonom o finansiranju političkih stranaka i Izbornim zakonom Bosne i Hercegovine i da finansijski izvještaj podnosi u skladu sa odredbama Pravilnika o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2013. godinu, utvrđeno je da HSS-NHI nije ispoštovala preporuke revizije.

5. NALAZI I PREPORUKE

5.1. NALAZI

a) HSS-NHI nije postupila u skladu sa odredbom člana 4. stav (1) Zakona o finansiranju političkih stranaka¹.

Kantonalni odbor HSS-NHI Herceg Bosna je svojim članovima isplatio novčana sredstva u iznosu od 9.300,00 KM. Predsjedniku kantonalnog odbora i njegovoj tajnici isplaćena su sredstva u iznosu od 4.400,00 KM, kao jednokratna novčana pomoć.

Pored pomenute jednokratne pomoći, funkcionerima stranke su, u skladu sa odlukama Kantonalnog odbora HSS-NHI Herceg Bosna, kao pozajmice odobrena i isplaćena sredstva u iznosu od 4.900,00 KM i to: predsjedniku kantonalnog odbora iznos od 1.600,00 KM, dopredsjedniku iznos od 1.300,00 KM i tajnici iznos od 2.000,00 KM. Iako se u odlukama navodi da su sredstva odobrena kao novčane pozajmice, stranka ih u poslovnim knjigama i finansijskom izvještaju nije iskazala kao potraživanja koja trebaju biti vraćena stranci, već ih je evidentirala kao trošak političke stranke.

Način isplate i utroška sredstva, koja je politička stranka ostvarila isključivo iz bužeta, ukazuje na nenamjensko trošenje sredstava, suprotno odredbi člana 4. stav (1) Zakona o finansiranju političkih stranaka.

b) Politička stranka je prekršila odredbe člana 11. i člana 12. stav (1), (3) i (4) Zakona o finansiranju političkih stranaka.

Revizijom finansijske dokumentacije i poslovnih knjiga HSS - NHI, utvrđeno je da stranka nije vodila poslovne knjige u skladu sa zakonom i nije uspostavila pravovremene, potpune i tačne evidencije o svojim prihodima i rashodima, čime je prekršila odredbe člana 12. stav (1) Zakona o finansiranju političkih stranaka².

Središnji ured političke stranke u 2013. godini nije vodio poslovne knjige, čime je prekršio računovodstvene propise i odredbe člana 11. Zakona o finansiranju političkih stranaka, koji političkim strankama propisuje obavezu vođenja poslovnih knjiga i podnošenje finansijskih izvještaja na način koji je utvrđen zakonom i drugim propisima u skladu sa zakonom.³

¹ Finansijska sredstva koja politička stranka, u skladu sa članom 3. stav (1) Zakona o finansiranju političkih stranaka stranka, obezbijedi za svoje finansiranje može koristiti isključivo za ostvarivanje ciljeva utvrđenih svojim programom i statutom.

² U skladu sa odredbom člana 12. stav (1) Zakona o finansiranju političkih stranaka, stranka je obavezna voditi evidencije o svojim prihodima i rashodima dužna je Centralnoj izbornoj komisiji BiH podnijeti finansijski izvještaj za svaku kalendarsku godinu.

³ Odredba člana 11. Zakona o finansiranju političkih stranaka odnosi se na poštivanje računovodstvenih propisa.

Finansijski izvještaj stranka nije podnijela u zakonom propisanom roku, niti u formi koju je propisala Centralna izborna komisija BiH, čime je prekršila odredbe člana 12. stav (3) istog Zakona⁴.

HSS-NHI nije dostavljala dokumentaciju po zahtjevima Centralne izborne komisije BiH, čime je prekršila odredbe člana 12. stav (4) Zakona o finansiranju političkih stranaka⁵.

(1) Politička stranka, odnosno njen Središnji ured u Sarajevu uopšte nije vodio poslovne knjige u 2013. godini.

- U svrhu revizije finansijskog izvještaja koji je politička stranka Centralnoj izornoj komisiji podnijela 16.05.2014. godine, od stranke je 20.08.2014. godine zatraženo da dostavi finansijsku dokumentaciju: bruto bilans Središnjeg ureda HSS-NHI na dan 31.12.2013. godine, glavnu knjigu sa analitičkim evidencijama u istom periodu i kopije izvoda sa transakcijskih računa. Obzirom da stranka, suprotno odredbi člana 12. stav (4) Zakona o finansiranju političkih stranaka, nije postupila po zahtjevu i nije dostavila poslovne knjige, dana 19.10.2014. godine je upućena urgencija za dostavljanje pomenute dokumentacije.

Politička stranka nije postupila ni po urgenciji, pa je u skladu sa Zaključkom Centralne izborne komisije BiH, političkoj stranci 12.01.2015. godine najavljena revizije u prostorijama stranke, počev od 16.02.2015. godine. U najavi revizije političkoj stranci je ponovo sugerisano da pripremi poslovne knjige za 2013. godinu i dostavi ih Centralnoj izornoj komisiji BiH u roku od sedam dana.

Središnji ured HSS-NHI je dostavio kopije izvoda sa tri transakcijska računa stranke, a dana 06.02.2015. godine, aktom broj: 01-75/15, obavijestio je Centralnu izbornu komisiju BiH, da nije u mogućnosti dostaviti poslovne knjige, odnosno bruto bilans i glavnu knjigu za period od 01.01. do 31.12.2013. godine, jer iste nisu ažurirane.

- U skladu sa računovodstvenim propisima politička stranka nije podnijela finansijski izvještaj za 2013. godinu nadležnoj instituciji, Agenciji za finansijske, informatičke i posredničke usluge (AFIP), iako je rok za podnošenje istog bio 28.02.2014. godine.

Politička stranka je u skladu sa članom 4. stav (2) Pravilnika o godišnjim finansijskim izvještajima političkih stranaka bila dužna da Centralnoj izornoj komisiji BiH, uz godišnji finansijski izvještaj dostaviti i kopiju pomenutog obračuna, ovjerenu od strane AFIP-a.

- Finansijski izvještaj za 2013. godinu, koji je, u skladu sa odredbom iz člana 12. stav (3) Zakona o finansiranju političkih stranaka bila obavezna podnijeti Centralnoj izornoj komisiji BiH do 31.03.2014. godine, HSS-NHI je podnijela 16.05.2014. godine.

Obzirom da središnjica HSS-NHI nije vodila poslovne knjige, nije sačinila završni račun u skladu sa računovodstvenim propisima i nije ga podnijela AFIP-u, nedvosmisleno je utvrđeno da godišnji finansijski izvještaj za 2013. godinu, koji je stranka podnijela Centralnoj izornoj komisiji BiH nije zasnovan na relevantnim knjigovodstvenim evidencijama i nije podnesen u skladu sa Pravilnikom o godišnjim finansijskim izvještajima političkih stranaka.

⁴ U skladu sa odredbom člana 12. stav (3) Zakona o finansiranju političkih stranaka, stranka je obavezna podnositi finansijski izvještaj do 31. 3. naredne godine, u formi koju odobri Centralna izborna komisija Bosne i Hercegovine. Sadržaj, forma, način i drugi detalji izvještavanja uređeni su Pravilnikom o godišnjim finansijskim izvještajima političkih stranaka („Službeni glasnik BiH“ broj 96/13).

⁵ Sva lica koja su dužna da podnesu izvještaj moraju da podnesu i dodatne izvještaje koje Centralna izborna komisija Bosne i Hercegovine zatraži

- (2) Revizorima Službe za reviziju finansiranja političkih stranaka, tokom revizije u prostorijama Središnjeg ureda HSS-NHI u Sarajevu, djelokrug revizije je bio ograničen, kako za Središnji ured stranke, tako i za dva niža organizaciona dijela, Kantonalni odbor HSS-NHI Središnja Bosna i Kantonalni odbor HSS-NHI Herceg Bosna.

Iako je u najavi revizije, koju je primila 14.01.2015. godine, stranka zamoljena da u cilju što bržeg i efikasnijeg obavljanja revizije, pripremi cjelokupnu dokumentaciju vezanu za poslovanje tri prethodno pomenuta organizaciona dijela, stranka nije pripremila dokumentaciju.

Tokom vršenja revizije u prostorijama stranke, osoba koja je u skladu sa članom 13. stav (1) Zakona o finansiranju političkih stranaka, od strane HSS-NHI imenovana kao osoba odgovorna za vođenje poslovnih knjiga, podnošenje finansijskih izvještaja, te u skladu sa odredbom iz stava (3) istog člana, potpisuje sve izvještaje i odgovorna je za vođenje evidencija u vezi sa izvještajima, a na zahtjev Centralne izborne komisije BiH obavezna je da dostavi izvještaje na uvid, revizorima Službe za reviziju finansiranja političkih stranaka je predočila nepotpunu dokumentaciju, sa također nepotpunim evidencijama o prihodima i rashodima i to samo za Središnjicu stranke u Sarajevu.

Dokumentacija i poslovne knjige Kantonalnog odbora HSS-NHI Središnja Bosna i Kantonalnog odbora HSS-NHI Herceg Bosna nije predočena revizorima. Ovlaštena osoba u političkoj stranci je usmeno saopštila da je dokumentacija Kantonalnog odbora HSS-NHI Središnja Bosna uništena u majskim poplavama 2014. godine⁶, i jedino sa čim raspolaže ovaj organizacioni dio stranke, su poslovne knjige u elektronskoj verziji, koje će Službi za reviziju biti naknadno dostavljene, kao i dokumentacija Kantonalnog odbora HSS-NHI Herceg Bosna.

Poslovne knjige, bruto bilans i glavnu knjigu, koje je Središnjica HSS-NHI ažurirala u toku revizije, Centralnoj izornoj komisiji BiH je dostavila 13.03.2015. godine, skupa sa poslovnim knjigama Kantonalnog odbora HSS-NHI Herceg Bosna i dijelom poslovnih knjiga Kantonalnog odbora HSS-NHI Središnja Bosna. Finansijsku dokumentaciju, na osnovu koje su sačinjene evidencije u poslovnim knjigama kantonalnih odbora, politička stranka nije dostavila. Za Kantonalni odbor HSS-NHI Središnja Bosna, politička stranka nije dostavila glavnu knjigu, čime je prekršila odredbe člana 12. stav (4) Zakona o finansiranju političkih stranaka.

- (3) Na osnovu dokumentacije i poslovnih knjiga Središnjice stranke, koje su sačinjene u vrijeme obavljanja revizije, te poslovnih knjiga pomenutih nižih organizacionih dijelova stranke, utvrđeno je da stranka, suprotno odredbama člana 12. stav (1) Zakona o finansiranju političkih stranaka nije uspostavila potpune i tačne evidencije o svojim prihodima i rashodima i suprotno odredbama člana 12. stav (3) Zakona, finansijski izvještaj nije podnijela u skladu sa Pravilnikom o godišnjim finansijskim izvještajima političkih stranaka.
- Prihod koji je ostvarila iz budžeta Općine Jajce, stranka je u finansijskom izvještaju iskazala u iznosu od 5.380,00 KM. Na zahtjev Centralne izborne komisije BiH, općina Jajce je dostavila akt, broj: 06-14-1295/14-1 od 09.09.2014. godine, u kome navodi da je stranci isplatila sredstva u iznosu od 6.567,00 KM. Iznos sredstava koji navodi Općina, utvrđen je i kroz izvode sa transakcijskog računa stranke.

⁶ Politička stranka je 17.05.2015. godine dostavila i pisani akt, u kome navodi da je dokumentacija KO HSS-NHI Središnja Bosna uništena prilikom poplave 2014. godine.

- Stranka je iskazala prihod ostvaren iz budžeta Općine Kiseljak u iznosu od 5.165,19 KM. Na osnovu akta Općine Kiseljak, broj: 04-14-396/14 od 05.09.2014. godine i izvoda sa transakcijskog računa stranke, utvrđen je prihod u iznosu od 5.739,10 KM.
 - U finansijskom izvještaju Središnji ured HSS-NHI je iskazao troškove u iznosu od 64.109,31 KM, dok su u poslovnim knjigama koje su uspostavljene u toku revizije iskazani troškovi u iznosu 68.534,67 KM.
 - Troškovi zakupnine za uredski prostor, koji prema ugovorima o zakupu⁷ u 2013. godini iznose 6.600,00 KM, stranka je u finansijskom izvještaju iskazala u iznosu od 5.900,00 KM, a u poslovnim knjigama u iznosu od 7.300,00 KM.
 - Troškove reprezentacije Središnjica stranke je u finansijskom izvještaju iskazala u iznosu od 2.081,52 KM, a u poslovnim knjigama u iznosu od 7.149,19 KM.
 - U finansijskom izvještaju politička stranka je iskazala ukupne obaveze na dan 31.12.2013. godine u iznosu od 7.734,02 KM, dok su u poslovnim knjigama iskazane obaveze u iznosu od 10.719,78 KM.
 - HSS-NHI u finansijskom izvještaju, na obrascu 2-1 (Pregled stanja blagajne) nije iskazala tačne podatke o prometu ostvarenom putem blagajne za Središnji ured stranke, čime je prekršila odredbe člana 12. Pravilnika o godišnjim finansijskim izvještajima političkih stranka. U finansijskom izvještaju stranka je iskazala sljedeće podatke o prometu ostvarenom putem blagajne središnjeg ureda: početno stanje na dan 01.01.2013. godine u iznosu od 207,81 KM, promet ulaza u iznosu od 6.200,00 KM, promet izlaza u iznosu od 5.978,00 KM i stanje na dan 31.12.2013. godine u iznosu od 429,23 KM. Kontrolom blagajničke dokumentacije utvrđen je promet ulaza u blagajnu u iznosu od 6.130,00 KM, promet izlaza iz blagajne u iznosu od 5.788,21 KM i stanje gotovine na dan 31.12.2013. godine u iznosu od 549,60 KM.
- (4) Politička stranka u poslovnim knjigama i finansijskom izvještaju nije iskazala trošak, niti obavezu po osnovu poreza i doprinosa na lična primanja, koja je politička stranka isplatila u iznosu od 15.813,47 KM.
- Središnica HSS-NHI je fizičkim licima, koja nemaju status uposlenika, za upotrebu vlastitih automobila na službenim putovanjima isplatila sredstva u iznosu od 5.513,47 KM. Politička stranka nije izdavala putne naloge za službena putovanja.
 - Kantonalni odbor HSS-NHI Herceg Bosna je svojim članovima isplatio novčana sredstva u iznosu od 10.300,00 KM. U skladu sa Odlukom, broj: 4-11/13 od 24.11.2013. godine predsjedniku kantonalnog odbora i tajnici isplaćena su sredstva u iznosu od 4.400,00 KM, kao jednokratna novčana pomoć.

Isplaćena su i sredstva fizičkom licu u iznosu od 1.000,00 KM u svrhu blagdanskih poklona.

U skladu sa odlukama Kantonalnog odbora HSS-NHI Herceg Bosna isplaćena su sredstva članovima odbora u iznosu od 4.900,00 KM. Sredstva su isplaćena predsjedniku kantonalnog odbora u iznosu od 1.600,00 KM⁸, dopredsjedniku u iznosu od 1.300,00 KM⁹ i tajnici

⁷ Ugovor zaključen 19.06.2013. godine u Sarajevu sa Ganić Emirom, uz mjesečnu zakupninu od 700,00 KM i Ugovor zaključen 02.01.2013. godine u Orašju sa Lukom Nedićem, uz mjesečnu zakupninu 200,00 KM.

⁸ Odluka broj: 2-2/13 od 24.02.2013. godine

⁹ Odluka broj:1-1/13 od 03.01.2013. godine

sredstva u iznosu od 2.000,00 KM¹⁰. Iako se u odlukama navodi da su sredstva odobrena kao novčane pozajmice, stranka ih u poslovnim knjigama i finansijskom izvještaju nije iskazala kao potraživanja koja trebaju biti vraćena političkoj stranci, već ih je evidentirala kao trošak.

Sredstva, koja su u iznosu od 5.513,47 KM isplaćena na ime troškova službenih putovanja licima koji nisu uposlenici stranke, sredstva u iznosu od 5.400,00 KM isplaćena i evidentirana kao humanitarni rashod i sredstva isplaćena u iznosu od 4.900,00 KM kao pozajmice, a koje je stranka evidentirala kao trošak i ne zahtijeva njihov povrat imaju karakter ličnih primanja, i opreziva su u skladu sa poreznim propisima¹¹.

Politička stranka je bila obavezna obračunati i platiti porez i doprinose, te ih kao trošak evidentirati u svojim poslovnim knjigama, u skladu sa odredbom člana 11. i člana 12. stav (1) Zakona o finansiranju političkih stranaka, dok je, u skladu sa odredbom člana 12. stav (3) istog Zakona, pomenute troškove bila obavezna prijaviti u finansijskom izvještaju koji je podnijela Centralnoj izbornoj komisiji BiH.

- (5) Uvidom u poslovne knjige Kantonalnog odbora HSS-NHI Herceg Bosna, utvrđeno je da stranka rashode ne evidentira u momentu kada su oni nastali, niti evidentira obaveze prema dobavljačima za primljene usluge, odnosno nabavke. Iz razloga što stranka nije evidentirala troškove koje nije platila, prekršila je računovodstvene propise i odredbe člana 11. i člana 12. stav (1) i (3) Zakona o finansiranju političkih stranaka. Obzirom da Službi za reviziju nije omogućen uvid u finansijsku dokumentaciju, nije utvrđeno, da li je ovaj organizacioni dio HSS-NHI ostvario i druge troškove osim onih koji su iskazani u finansijskom izvještaju u iznosu od 13.803,47 KM.
- (6) Na osnovu naloga za knjiženje kod Kantonalnog odbora HSS-NHI Središnja Bosna utvrđeno je da evidencije o prihodima rashodima nisu blagovremeno uspostavljane, kako to nalažu računovodstveni propisi. Sve evidencije su sačinjene na dan 31.12.2013. godine. Uvidom u bruto bilans, utvrđeno je da ovaj organizacioni dio stranke nema iskazane obaveze na dan 31.12.2013. godine, što ukazuje na činjenicu da su evidentirani samo oni troškovi koji su plaćeni. Obzirom da dobavljači troškove električne energije, telefona i druge režijske troškove za mjesec decembar fakturišu sa datumom 31.12., isti nisu mogli biti plaćeni u 2013. godini, pa ih je politička stranka morala evidentirati kao trošak i neizmirenu obavezu. Kako Službi za reviziju nije omogućen uvid u glavnu knjigu i finansijsku dokumentaciju na osnovu koje su uspostavljene evidencije o prihodima i rashodima stranke, te evidencije blagajničkog poslovanja, nije utvrđeno da li je Kantonalni odbor HSS-NHI Središnja Bosna ostvario i druge troškove osim onih koji su iskazani u finansijskom izvještaju u iznosu od 35.020,10 KM.

¹⁰ Odluka broj: 3-10/13 od 13.10.2013. godine

¹¹ Zakon o porezu na dohodak ("Službene novine Federacije BiH", br. 10/08, 9/10, 44/11, 07/13 i 65/13) i Pravilnik o primjeni Zakona o porezu na dohodak ("Službene novine Federacije BiH", broj: 67/08, 4/10, 86/10, 10/11, 53/11, 20/12, 27/13, 71/13 i 90/13)

5.2. PREPORUKE

Preporučuje se HSS-NHI da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da sredstva koja obezbijedi za finansiranje stranke, troši u skladu sa odredbom iz člana 4. stav (1) Zakona, a ne za donacije stranačkim funkcionerima,*
- *da poslovne knjige vodi u skladu sa računovodstvenim propisima,*
- *da uspostavi blagovremene, potpune i tačne evidencije o prihodima, rashodima i obavezama stranke,*
- *da finansijske izvještaje Centralnoj izbornoj komisiji Bosne i Hercegovine podnosi u skladu sa Pravilnikom o godišnjim finansijskim izvještajima političkih stranaka,*
- *da na zahtjev Centralne izborne komisije dostavlja finansijsku dokumentaciju i druge izvještaje u skladu sa članom 12. stav (4) Zakona, te revizorima Službe za reviziju obezbijedi pristup dokumentaciji neophodnoj za vršenje revizije finansiranja političke stranke i*
- *da poštuje i druge propise, prevashodno porezne, iz kojih proističu dodatne obaveze i troškovi, koje politička stranka treba izmirivati i evidentirati u poslovnim knjigama i finansijskom izvještaju koji podnosi Centralnoj izbornoj komisiji BiH.*

KOMENTAR:

HSS-NHI nije se očitovala na nalaze revizije navedene u Preliminarnom izvještaju o reviziji godišnjeg finansijskog izvještaja za 2013. godinu, koji je stranci dostavljen 22.05.2015. godine.

Revizor

Nevenko Andan

Šef Službe za reviziju, revizor

mr.sc. Hasida Gušić